

觀世音菩薩得大勢 菩薩受記經

劉宋黃龍沙門釋曇無竭譯



南無本師釋迦牟尼佛

說明

根據《乾隆大藏經》大乘單譯經，第 0391 部，劉宋黃龍沙門釋曇無竭譯《觀世音菩薩得大勢菩薩受記經》影印本校正的。句讀及注音僅供參考。

本電子書是免費結緣品，特此說明。

仁慧草堂

二〇二〇年十月



扫码关注仁慧草堂微信公众号

● 起誦儀

誦經警文

1. 未誦前，漱口澡手。當淨三業。若三業無虧，則百福俱集。三業者，身口意也。端身正坐，如對聖容，則身業淨也。口無雜言，斷諸嬉笑，則口業淨也。意不散亂，屏息萬緣，則意業淨也。
2. 未誦前，已誦後，俱要對聖像前合掌三禮。如無佛像，對經，對空禮拜亦可。

香讚

(一徧)

爐香乍爇，法界蒙薰，諸佛海會悉遙聞，隨處結祥雲，誠意方殷，諸佛現全身。

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一徧)

無上甚深微妙法 百千萬劫難遭遇
我今見聞得受持 願解如來真實義

觀世音菩薩得大勢菩薩受記經¹

劉宋黃龍沙門釋曇無竭譯²

如是我聞：

一時，佛在波羅奈仙人鹿苑中，與大比丘眾二萬人俱，菩薩萬二千，其名曰：師子菩薩、師子意菩薩、安意菩薩、無喻意菩薩、持地菩薩、那³羅達菩薩、神天菩薩、寶⁴事菩薩、伽睺多菩薩、賢力菩薩、明天菩薩、愛喜菩薩、文殊師利菩薩、智行菩薩、專行菩薩、現無癡⁵菩薩、彌勒菩薩，如是等上首菩薩摩訶薩萬二千人俱。復有二萬天子，善界天子、善住天子等以為上首，皆住大乘。

爾時，世尊與無量百千眷屬圍遶而為說法。

爾時，會中有一菩薩，名華德藏，即從坐起，偏袒右肩，右膝著地，合掌向佛，而作是言：「惟願世尊，賜我中間，欲有所問。」

佛告華德藏菩薩：「恣汝所問，諸有疑者，

¹ 麗本：觀世音菩薩授記經；永樂北藏本及龍藏本：觀世音菩薩得大勢菩薩受記經

² 麗本：宋黃龍國沙門曇無竭譯；永樂北藏本及龍藏本：

³ 麗本：般；永樂北藏本及龍藏本：那

⁴ 麗本：實；永樂北藏本及龍藏本：寶

⁵ 麗本：礙；永樂北藏本及龍藏本：癡

吾已知之，當為解說，令汝歡喜。」

爾時，華德藏白佛言：「世尊！菩薩摩訶薩云何不退轉於阿耨多羅三藐三菩提及五神通，得如幻三昧，得是三昧⁶，以善方便能化其身，隨眾形類所成善根而為說法，令得阿耨多羅三藐三菩提？」

佛告華德藏菩薩摩訶薩：「善哉！善哉！能於如來等正覺前問如是義。汝華德藏，已於過去諸佛植⁷諸善根，供養無數百千萬億諸佛世尊，於諸眾生興大悲心。善哉！華德藏，諦聽！諦聽！善思念之！當為汝說。」

對曰：「唯然！願樂欲聞。」

佛告華德藏菩薩摩訶薩：「成就一法，得如幻三昧。得是三昧，以善方便能化其身，隨眾形類所成善根而為說法，令得阿耨多羅三藐三菩提。何等一法？謂無依止。不依三界，亦不依內，又不依外，於無所依得正觀察。正觀察已，便得正盡，而於覺知無所損減。以無減心悉度正慧，謂一切法從緣而起，虛假而有。一切諸法因緣而生，若無因緣，無有生法。雖一切法從因緣生，而無

⁶ 麗本：昧；永樂北藏本及龍藏本：昧，得是三昧

⁷ 麗本：殖；永樂北藏本及龍藏本：植

所生。如是通達無生法者，得入菩薩真實之道，亦名得入大慈悲心，憐愍度脫一切眾生。善能深解如是義已，則知一切諸法如幻，但以憶想語言造化法耳。然此憶想語言造化諸法，究竟悉空。善能通達諸法空已，是名逮得如幻三昧。得是三昧⁸，以善方便能化其身，隨眾形類所⁹成善根而為說法，令得阿耨多羅三藐三菩提。」

爾時，華德藏菩薩摩訶薩白佛言：「世尊！於此眾中，頗有菩薩得是三昧乎？」

佛言：「有！今是會中，彌勒菩薩、文殊師利等六十正士，不可思議大誓莊嚴，得是三昧。」

又白佛言：「世尊！唯此世界菩薩得是三昧，他方世界復有菩薩，成就如是如幻三昧？」

佛告華德藏：「西方過此億百千刹，有世界名安樂，其國有佛，號阿彌陀如來、應供、正遍知，今現在說法。彼有菩薩，一名觀世音，二名得大勢，得是三昧。復次，華德藏，若有菩薩從彼正士，七日七夜聽受是法，即便¹⁰逮得如幻三昧。」

華德藏菩薩白佛言：「世尊！彼國應有無量

⁸ 麗本：三昧已；永樂北藏本及龍藏本：是三昧

⁹ 麗本：而；永樂北藏本及龍藏本：所

¹⁰ 麗本：便；永樂北藏本及龍藏本：即便

菩薩得是三昧。何以故？其餘菩薩生彼國者，皆當往至彼正士所，聽受是法。」

佛言：「如是，如是！如汝所言。有無量阿僧祇菩薩摩訶薩，從彼正士得是三昧。」

華德藏菩薩白佛言：「善哉！世尊、如來、應供、正遍知！願以神力，令彼正士至此世界，又令彼此兩得相見。何以故？以彼正士至此刹故，善男子、善女人成善根者，聞其說法得是三昧；又願見彼安樂世界阿彌陀佛，令此善男子、善女人發阿耨多羅三藐三菩提心，願生彼國。生彼國已，終¹¹不退轉阿耨多羅三藐三菩提。」

爾時，世尊受彼請已，即放眉間白毫相光，遍照三千大千國土，於此世界草木土石、須彌山王、目真隣陀山、大目真隣陀山、斫迦羅山、大斫迦羅山，乃至世界中間幽冥之處，普皆金色，莫不大明。日月暉曜及大力威光，悉不復現。遍照西方億百千刹乃至安樂世界，悉皆金色。大光右遶彼佛七匝，於如來前廓然不現。

彼國眾生、菩薩、聲聞悉見此土及釋迦文與諸大眾圍遶說法，猶如掌中觀阿摩勒果，皆生愛樂歡喜之心，唱如是言：「南無釋迦如來、應供、

¹¹ 麗本：絕；永樂北藏本及龍藏本：終

正遍知。」

於此眾會，比丘、比丘尼、優婆塞、優婆夷、天、龍、夜叉、乾闥婆、阿修羅、迦樓羅、緊那羅、摩睺羅伽、人、非人等，釋梵四天王、菩薩、聲聞，皆見安樂世界阿彌陀佛，菩薩、聲聞眷屬圍遶，晃若寶山高顯殊特，威光赫奕普照諸刹，如淨目人於一尋內覩人面貌明了無礙。既見是已，歡喜踊躍，唱如是言：「南無阿彌陀如來、應供、正遍知。」

時，此眾中八萬四千眾生皆發阿耨多羅三藐三菩提心，及種善根，願生彼國。

爾時，安樂世界菩薩、聲聞見此刹已，怪未曾有，歡喜合掌，禮釋迦牟尼如來、應供、正遍知，作如是言：「南無釋迦牟尼佛，能為菩薩、聲聞說如是法！」

爾時，安樂世界六種震動，動、遍動、等遍動，搖、遍搖、等遍搖，震、遍震、等遍震。

爾時，觀世音及得大勢菩薩摩訶薩白彼佛言：「甚奇！世尊！釋迦如來現希有事。何以故？彼釋迦牟尼如來、應供、正遍知，少現名號，令無量¹²大地六種震動。」

¹² 麗本：想；永樂北藏本及龍藏本：量

爾時，阿彌陀佛告彼菩薩：「釋迦牟尼不但此土現其名號，其餘無量諸佛世界悉現名號。大光普照六種震動，亦復如是。彼諸世界無量阿僧祇眾生，聞釋迦牟尼稱譽名號，善根成就，皆得不退轉於阿耨多羅三藐三菩提。」

時，彼眾中四十億菩薩，聞釋迦牟尼如來、應供、等正覺名號，同聲發願，善根迴向阿耨多羅三藐三菩提。佛即授記，當得阿耨多羅三藐三菩提。

爾時，觀世音及得大勢菩薩摩訶薩，詣彼佛所，頭面禮足，恭敬合掌，於一面住，白佛言：「世尊！釋迦牟尼放此光明，何因何緣？」

爾時，彼佛告觀世音：「如來、應供、等正覺放斯光明，非無因緣。何以故？今日釋迦牟尼如來、應供、正遍知將欲演說菩薩珍寶處三昧經，故先現瑞。」

爾時，觀世音及得大勢菩薩摩訶薩白佛言：「世尊！我等欲詣娑婆世界，禮拜供養釋迦牟尼佛，聽其說法。」

佛言：「善男子，宜知是時。」

時，二菩薩即相謂言：「我等今日定聞彼佛所說妙法。」

時，二菩薩受佛教已，告彼四十億菩薩眷屬：「善男子，當共往詣娑婆世界，禮拜供養釋迦牟尼佛，聽受正法。何以故？釋迦牟尼如來，應供、等正覺能為難事，捨淨妙國，以本願力，興大悲心，於薄德少福、增貪恚癡、濁惡世中，成阿耨多羅三藐三菩提，而為說法。」

說是語時，菩薩、聲聞同聲歎言：「彼土眾生得聞釋迦牟尼如來、應供、正遍知名號，快得善利，何況得見發歡喜心！世尊！我等當共詣彼世界，禮拜供養釋迦牟尼佛¹³。」

佛言：「善男子，宜知是時。」

爾時，觀世音及得大勢菩薩摩訶薩與四十億菩薩前後圍遶，於彼世界以神通力各為眷屬化作四十億莊嚴寶臺。是諸寶臺縱廣十二由旬，端嚴微妙。其寶臺上，有處黃金，有處白銀，有處琉璃，有處頗梨，有處赤珠，有處碑磔¹⁴，有處碼碯¹⁵，有處二寶黃金、白銀，有處三寶金、銀、琉璃，有處四寶黃金、白銀、琉璃、頗梨，有處五寶金、銀、琉璃、頗梨、赤珠，有處六寶黃金、

¹³ 麗本：尼佛；永樂北藏本及龍藏本：尼；校勘：尼佛

¹⁴ 麗本：車渠；永樂北藏本及龍藏本：碑磔

¹⁵ 麗本：馬瑙；永樂北藏本及龍藏本：碼碯

白銀、琉璃、頗梨、**碑磔**¹⁶、赤珠，有處七寶，乃至**碼瑙**¹⁷。又以赤珠、梅檀、優鉢羅、鉢曇摩、拘物頭、分陀利而莊嚴之。

又雨須曼那華、瞻蔔華、波羅羅華、阿提目多華、羅尼華、瞿羅尼華、曼陀羅華、摩訶曼陀羅華、波樓沙華、摩訶波樓沙華、曼殊沙華、摩訶曼殊沙華、盧遮那華、摩訶盧遮那華、遮迦華、摩訶遮迦華、蘇樓至遮迦華、梅那華、摩訶梅那華、蘇樓至梅檀那華、梅奴多羅華、他羅¹⁸華、摩訶他羅¹⁹華，其寶臺上種種雜色，**徧爛**²⁰煒曄清淨照耀。

諸寶臺上，有化玉女八萬四千，或執箜篌、琴瑟、箏笛、琵琶、鼓貝，如是無量眾寶樂器，奏微妙音，儼然而住。或有玉女，執赤梅檀香、沉水梅檀香，或執黑沉水梅檀香，儼然而住。或有玉女，執優波羅、波頭摩、拘物頭、分陀利**華果**²¹，儼然而住。或有玉女，執曼陀羅華、摩訶曼陀羅華、波樓沙華、摩訶波樓沙華、盧遮那華、摩訶盧遮那華、梅那華、摩訶梅那華、蘇樓至梅

¹⁶ 麗本：車渠；永樂北藏本及龍藏本：碑磔

¹⁷ 麗本：馬瑙；永樂北藏本及龍藏本：碼瑙

¹⁸ 麗本：邏；永樂北藏本及龍藏本：羅

¹⁹ 麗本：邏；永樂北藏本及龍藏本：羅

²⁰ 麗本：斑爛；永樂北藏本及龍藏本：徧爛

²¹ 麗本：華；永樂北藏本及龍藏本：華果

那華、遮迦華、摩訶遮迦華、蘇樓至遮迦華、陀羅華、摩訶陀羅華、蘇樓至陀羅華，莊嚴而住。或有玉女，執一切華果，儼然而住。

諸寶臺上，眾寶莊嚴師子之座，座上皆有化佛，三十二相、八十種好而自嚴身。臺上各懸八萬四千青黃赤白雜真珠，貫諸寶臺上。各有八萬四千眾妙寶瓶，盛滿末香，列置其上。諸寶臺上，各有八萬四千眾寶妙蓋彌覆其上。諸寶臺上，各有八萬四千眾妙²²寶樹植立²³其上。諸寶臺上，各有八萬四千寶鈴羅網²⁴羅覆其上。諸寶樹間有七寶池，八功德水盈滿其中。青黃赤白雜寶蓮華，光色鮮映。微風吹動，眾寶行樹出微妙音，其音和雅踰於天樂。諸寶臺上，各有八萬四千眾妙寶繩連綿樹間。一一寶臺，光明照耀八萬四千由旬，莫不大明。

爾時，觀世音及得大勢菩薩摩訶薩與其眷屬八十²⁵億眾諸菩薩俱，莊嚴寶臺悉皆同等，譬如力士屈伸臂頃，從彼國沒，至此世界。

時，彼菩薩以神通力，令此世界地平如水，與八十億菩薩前後圍遶，以大功德莊嚴成就，端

²² 麗本：眾；永樂北藏本及龍藏本：眾妙

²³ 麗本：殖；永樂北藏本及龍藏本：植立

²⁴ 麗本：羅；永樂北藏本及龍藏本：羅網

²⁵ 麗本：千；永樂北藏本及龍藏本：十

嚴殊特無可為喻，光明遍照娑婆世界。

是諸菩薩詣釋迦牟尼佛所，頭面禮足，右遶七匝，却住一面，白佛言：「世尊！阿彌陀佛問訊世尊，少病少惱，起居輕利，安樂行不？」

又現彼土莊嚴妙事時，此菩薩及聲聞眾見此寶臺眾妙莊嚴，歎未曾有，各作是念：「此諸寶臺莊嚴微妙，從安樂國至此世界，為是佛力？菩薩力耶？」

爾時，華德藏菩薩承佛神力白佛言：「甚奇！世尊！未曾有也！今此娑婆世界，眾妙寶臺莊嚴如是，是誰威力？」

佛言：「是觀世音及得大勢神通之力，於此世界現大莊嚴。」

「甚奇！世尊！不可思議！彼善男子願行清淨，能以神力莊嚴寶臺現此世界。」

佛言：「如是，如是！如汝所說，彼善男子已於無數億那由他百千劫中，淨諸善根，得如幻三昧。住是三昧，能以神通變化現如是事。又，華德藏，汝今且觀東方世界，為何所見？」

時，華德藏即以菩薩種種天眼觀于東方恒河沙等諸佛世界，見彼佛前皆有觀世音及得大勢，莊嚴如前，恭敬供養，皆稱：「阿彌陀佛問訊世

尊，少病少惱，起居輕利，安樂行不？」南西北方、四維上下亦復如是。

爾時，華德藏菩薩見是事已，歡喜踊躍，得未曾有，而白佛言：「甚奇！世尊！今此大士乃能成就如是三昧。何以故？今此正士能現莊嚴是諸佛刹。」

爾時，世尊即以神力，令此眾會見是事已，三萬二千人發阿耨多羅三藐三菩提心。

華德藏菩薩白佛言：「世尊！是二正士，久如發阿耨多羅三藐三菩提心，於何佛所？唯願說之，令諸菩薩，修此願行具足成就。」

佛言：「諦聽！善思念之，當為汝說。」

「善哉！世尊！願樂欲聞。」

佛言：「乃往過去廣遠無量不可思議阿僧祇劫，我於爾時為百千王。時初大王劫欲盡時，有世界名無量德聚安樂示現，其國有佛，號金光師子遊戲如來、應供、正遍知、明行足、善逝、世間解、無上士、調御丈夫、天人師、佛、世尊，是佛刹土所有清淨嚴飾之事，今為汝說。於意云何？安樂世界阿彌陀佛國土所有嚴淨之事，寧為多不？」

答曰：「甚多！不可思議，難可具說。」

佛告華德藏：「假使有人，分析一毛以為百分²⁶，以一分毛滴²⁷大海水，於意云何？一毛端水於大海水，何者為多？」

答曰：「海水甚多，不可為譬。」

「如是，華德藏，應作是知，阿彌陀國莊嚴之事如毛端水，金光師子遊戲佛國如大海水。聲聞、菩薩差降亦爾。彼金光師子遊戲如來亦為眾生說三乘法。我於恒沙等劫說此佛國功德莊嚴、菩薩聲聞快樂之事，猶不能盡。爾時，金光師子遊戲如來法中有王，名曰威德王。千世界正法治化，號為法王。其威德王多諸子息，具二十八大人之相。是諸王子，皆悉住於無上之道。王有七萬六千園觀，其王諸子遊戲其中。」

華德藏白佛言：「世尊！彼佛刹土有女人耶？」

佛言：「善男子，彼佛國土尚無女名，何況有實？其國眾生淨修梵行，純一化生，禪悅為食。彼威德王於八萬四千億歲，奉事如來不習餘法。佛知至心，即為演說無量法印。何等為無量法印？華德藏菩薩，凡所修行，應當發於無量誓願。何

²⁶ 麗本：毛；永樂北藏本及龍藏本：分

²⁷ 麗本：滴；永樂北藏本及龍藏本：滴

以故？菩薩摩訶薩布施無量、持戒無量、忍辱無量、精進無量、禪定無量、智慧無量、所行六度攝生死無量、慈愍眾生無量、莊嚴淨土無量、成就色無量²⁸、音聲無量、辯才無量。華德藏，乃至一念善根²⁹應迴向無量。云何迴向無量？如迴向一切眾生，令一切眾生得無生證，以佛涅槃而般涅槃，是名迴向無量。無量³⁰空無量、無相無量、無願無量，無行如是，無欲實際，法性無生，無著解脫，涅槃無量。善男子，我但略說諸法無量。何以故？以一切法無³¹限量故³²。

「復次，華德藏，彼威德王於其園觀，入於³³三昧。其王左右有二蓮華從地涌³⁴出，雜色莊嚴，其香芬馥，如天梅檀。有二童子化生其中，加趺而坐。一名寶意，二名寶上。時，威德王從禪定起，見二童子坐蓮華藏，以偈問曰：

汝為天龍神³⁵ 夜叉鳩槃荼³⁶
為人為非人 願說其名號

「時，王右面童子以偈答曰：

²⁸ 麗本：量；永樂北藏本及龍藏本：量、成就色無量

²⁹ 麗本：相；永樂北藏本及龍藏本：根

³⁰ 麗本：邊；永樂北藏本及龍藏本：量

³¹ 麗本：無有；永樂北藏本及龍藏本：無

³² 麗本：量；永樂北藏本及龍藏本：量故

³³ 麗本：于；永樂北藏本及龍藏本：於

³⁴ 麗本：踊；永樂北藏本及龍藏本：涌

³⁵ 麗本：王；永樂北藏本及龍藏本：神

³⁶ 麗本：荼；永樂北藏本及龍藏本：茶

一切諸法空 云何問名字³⁷
過去法已滅 當來法未生
現在法不住 仁者問誰名
空法亦非人 非龍非羅刹
人與非人等 一切不可得

「左面童子而說偈言：

名名者悉空 名名不可得
一切法無名 而欲問名字
欲求真實名 未曾所見聞
夫生法即滅 云何而問名
說名字語言 皆是假施設
我名為寶意 彼名為寶上

「華德藏，是二童子說是偈已，與威德王俱詣佛所，頭面禮足，右遶七匝，合掌恭敬於一面住。

「時，二童子即共同聲，以偈問佛：

云何為供養 無上兩足尊
願說其義趣 聞者當奉行
華香眾伎樂 衣服³⁸藥臥具
如是等供養 云何為最勝

³⁷ 麗本：號；永樂北藏本及龍藏本：字

³⁸ 麗本：食；永樂北藏本及龍藏本：服

「爾時，彼佛即為童子而說偈言：

當發菩提心	廣濟諸群生
是則供正覺	三十二明相
設滿恒沙剎	珍妙莊嚴具
奉獻諸如來	及歡喜頂戴
不如以慈心	迴向於菩提
是福為最勝	無量無有邊
餘供無過者	超踰不可計
如是菩提心	必成等正覺

「時，二童子復說偈言：

諸天龍鬼神	聽我師子吼
今於如來前	弘誓發菩提
生死無量劫	本際不可知
為一眾生故	爾數劫行道
況此諸劫中	度脫無量眾
修行菩提道	而生疲倦 ³⁹ 心
我若從今始	起於貪欲心
是則為欺誑	十方一切佛
瞋恚愚癡垢	慳嫉亦復然
今我說實語	遠離於虛妄
我若於今始	起於聲聞心

³⁹ 麗本：倦；永樂北藏本及龍藏本：倦

不樂修菩提 是則欺世尊
亦不求緣覺 自濟利己身
當於萬億劫 大悲度眾生
如今日佛土 清淨妙莊嚴
令我得道時 超踰億百千
國無聲聞眾 亦無緣覺乘
純有諸菩薩 其數無限量
眾生淨無垢 悉具上妙樂
出生於正覺 總持諸法藏
此誓若誠實 當動大千界
說如是偈已 應時普震動
百千眾伎樂 演發和雅音
光曜⁴⁰微妙服 旋轉而來降
諸天於空中 雨散眾末香
其香普流熏 悅可眾生心

佛告華德藏：「於汝意云何？爾時威德王者豈異人乎？我身是也。時二童子，今觀世音及得大勢菩薩摩訶薩是也。善男子，是二菩薩於彼佛所初發阿耨多羅三藐三菩提心。」

爾時，華德藏白佛言：「甚奇！世尊！是善男子未曾發心成就如是甚深智慧，了達名字悉不

⁴⁰ 麗本：耀；永樂北藏本及龍藏本：曜

可得。世尊！是二正士於彼先佛已曾供養作諸功德？」

「善男子，此恒河沙悉可知數，而此大士先供養佛種諸善根不可稱計。雖未發於菩提之心，而以不可思議而自莊嚴，於諸眾生為最勇猛。」

爾時，華德藏菩薩白佛言：「世尊！其無量德聚安樂示現國土，為在何方？」

佛言：「善男子，今此西方安樂世界，當於爾時號無量德聚安樂示現。」

華德藏菩薩白佛言：「世尊！願為解說，令無量眾生得大利益。是觀世音於何國土成等正覺？世界莊嚴光明名號，聲聞、菩薩壽命所有，乃至成佛，其事云何？若世尊說是菩薩先所行願，其餘菩薩聞是願已，必當修行而得滿足。」

佛言：「善哉！諦聽！當為汝說。」

對曰：「唯然！願樂欲聞。」

佛言：「善男子，阿彌陀佛壽命無量百千億劫當有終極。善男子，當來曠⁴¹遠不可計劫，阿彌陀佛當般涅槃。般涅槃後，正法住世等佛壽命。在世滅後，所度眾生悉皆同等。佛涅槃後，或有眾生不見佛者，有諸菩薩得念佛三昧，常見阿彌

⁴¹ 麗本：廣；永樂北藏本及龍藏本：曠

陀佛。復次，善男子，彼佛滅後，一切寶物、浴池、蓮華、眾寶行樹，常演法音與佛無異。善男子，阿彌陀佛正法滅後，過中夜分明相出時，觀世音菩薩於七寶菩提樹下結加趺坐，成等正覺，號普光功德山王如來、應供、正遍知、明行足、善逝、世間解、無上士、調御丈夫、天人師、佛、世尊。其佛國土自然七寶、眾妙合成莊嚴之事，諸佛世尊於恒沙劫說不能盡。善男子，我於今者為汝說譬，彼金光師子遊戲如來國土莊嚴之事，方於普光功德山王如來國土，百倍、千倍、千萬⁴²億倍、億兆載倍，乃至算數所不能及。其佛國土無有聲聞、緣覺之名，純諸菩薩，充滿其國。」

華德藏菩薩白佛言：「世尊！彼佛國土名安樂耶？」

佛言：「善男子，其佛國土號曰眾寶普集莊嚴。善男子，普光功德山王如來隨其壽命，得大勢菩薩親近⁴³供養，至于涅槃。般涅槃後，奉持正法，乃至滅盡。法滅盡已，即於其國，成阿耨多羅三藐三菩提，號曰善住功德寶王如來、應供、正遍知、明行足、善逝、世間解、無上士、調御

⁴² 麗本：萬千倍；永樂北藏本及龍藏本：倍千倍千萬

⁴³ 麗本：覲；永樂北藏本及龍藏本：近

丈夫、天人師、佛、世尊。如普光功德山王如來國土、光明壽命諸⁴⁴菩薩眾，乃至法住，等無有異。若善男子、善女人聞善住功德寶王如來名者，皆得不退於阿耨多羅三藐三菩提。又善男子，若有女人得聞過去金光師子遊戲如來、善住功德寶王如來名者，皆轉女人⁴⁵身，却四十億劫生死之罪，皆不退轉於阿耨多羅三藐三菩提，常得見佛，聞受正法，供養眾僧；捨此身已，當得出⁴⁶家成無礙辯，速⁴⁷得總持。」

爾時，會中六十億眾同聲歎言：「南無十方般涅槃佛。」同心共議，發阿耨多羅三藐三菩提心⁴⁸。佛即授⁴⁹記當成阿耨多羅三藐三菩提。

復有八萬四千那由他眾生，遠塵離垢，於諸法中得法眼淨。七千比丘漏盡意解。

爾時，觀世音及得大勢菩薩即以神力，令此眾會悉見十方無數諸佛世尊，皆為授其阿耨多羅三藐三菩提記。見已歎言：「甚奇！世尊！是諸如來為此大士授如是記！」

爾時，華德藏菩薩白佛言：「世尊！若善男

⁴⁴ 麗本：命；永樂北藏本及龍藏本：命諸

⁴⁵ 麗本：女；永樂北藏本及龍藏本：女人

⁴⁶ 麗本：出；永樂北藏本及龍藏本：當得出

⁴⁷ 麗本：速；永樂北藏本及龍藏本：速

⁴⁸ 麗本：提；永樂北藏本及龍藏本：提心

⁴⁹ 麗本：受；永樂北藏本及龍藏本：授

子、善女人於此如來甚深經典，受持讀誦，解說書寫，廣宣流布，得幾所福？唯願如來分別解說。何以故？當來惡世薄福⁵⁰眾生，於此如來甚深經典而不信受，以是因緣，長夜受苦難得解脫。世尊！唯願說之，憐愍利益諸眾生故。世尊！今此會中，多有利根善男子、善女人，於當來世而作大明。」

佛言：「華德藏，善哉諦聽！當為汝說。」

對曰：「受教！願樂欲聞。」

佛言：「若善男子以三千大千世界一切眾生置兩肩上，盡其形壽，隨所須欲，衣食、臥具、床褥、湯藥，而供養之，所得功德寧為多不？」

「甚多！世尊！若以慈心供一眾生隨其所須，功德無量，何況一切？」

佛言：「若善男子、善女人於此經典，受持讀誦，解說書寫，種種供養，廣宣流布，發菩提心，所得功德，百千萬倍不可為譬。」

華德藏菩薩白佛言：「世尊！我從今日，於此如來所說經典，及過去當來三佛名號，常當受持讀誦，解說書寫，廣宣流布，遠離貪恚癡心，發阿耨多羅三藐三菩提，終不虛妄。世尊！設我

⁵⁰ 麗本：德；永樂北藏本及龍藏本：福

成佛⁵¹，若有女人聞如是法，現轉女身；轉女身已，當為授記，得阿耨多羅三藐三菩提，號曰離垢多陀阿伽度、阿羅呵、三藐三佛陀。」

說是經已，華德藏菩薩摩訶薩及諸比丘、比丘尼、菩薩、聲聞、天、龍、夜叉、乾闥婆、阿修羅、迦樓羅、緊那羅、摩睺羅伽、人、非人等，聞佛所說，皆大歡喜。

觀世音菩薩得大勢菩薩受記經⁵²

⁵¹ 麗本：我成佛者；永樂北藏本及龍藏本：设我成佛

⁵² 麗本：觀世音菩薩授記經；永樂北藏本及龍藏本：觀世音菩薩得大勢菩薩受記經

● 結誦儀

補闕真言

(三徧)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛拏. 吽. 潑抹拏. 娑
婆訶.

補闕圓滿真言

(三徧)

唵. 呼嚧呼嚧. 社曳穆契. 莎訶

普回向真言

(三徧)

唵^一娑摩囉^二娑摩囉^三彌摩曩^四薩哈^{呼馬切}囉^五摩訶^{爻上聲}咱^六
哈囉吽^六

拔一切業障根本得生淨土陀羅尼

(三遍)

南無阿彌多婆夜。哆他伽路夜。哆地夜他。
阿彌唎。都婆毗。阿彌唎哆。悉耽婆毗。阿彌唎
哆。毗迦蘭帝。阿彌唎哆。毗迦蘭哆。伽彌膩。
伽伽那。枳多迦隸。娑婆訶。

(不思議神力傳云。若欲受持呪法。嚼楊枝。澡豆。漱口。
然香。于佛像前胡跪合掌。日夜六時。各誦三七遍。即滅四重。
五逆。十惡。謗方等罪。悉得滅除。現世所求皆得。不為惡鬼神
所惑亂。若數滿二十萬遍。即感得菩提牙生。若至三十萬遍。即
面見阿彌陀佛。拔一切業障根本得生淨土神呪云。若有善男子善
女人能誦此呪者。阿彌陀佛常住其頂日夜擁護。無令怨家而得其
便。現世常得安隱。臨命終時。任運往生。)

讚佛偈

(一遍)

阿彌陀佛身金色 相好光明無等倫
白毫宛轉五須彌 紺目澄清四大海
光中化佛無數億 化菩薩眾亦無邊
四十八願度眾生 九品咸令登彼岸

南無西方極樂世界大慈大悲阿彌陀佛 一稱

南無阿彌陀佛 千稱或數百稱

阿彌陀佛 千稱或數百稱

南無觀世音菩薩 三稱三拜

南無大勢至菩薩 三稱三拜

南無清淨大海眾菩薩 三稱三拜

慈雲懺主淨土文

(一遍)

一心皈命。極樂世界。阿彌陀佛。願以淨光照我。慈誓攝我。我今正念。稱如來名。爲菩提道。求生淨土。佛昔本誓。若有眾生。欲生我國。至心信樂。乃至十念。若不生者。不取正覺。以此念佛因緣。得入如來大誓海中。承佛慈力。眾罪銷滅。善根增長。若臨命終。自知時至。身無病苦。心不貪戀。意不顛倒。如入禪定。佛及聖眾。手執金臺來迎接我。於一念頃。生極樂國。華開見佛。即聞佛乘。頓開佛慧。廣渡眾生。滿菩提願。

十方三世一切佛。一切菩薩摩訶薩。摩訶般若波羅蜜。

迴向偈

(一遍)

願生西方淨土中 九品蓮華為父母
華開見佛悟無生 不退菩薩為伴侶

三皈依

(一遍)

自皈依佛。當願眾生。體解大道。發無上心。
自皈依法。當願眾生。深入經藏。智慧如海。自
皈依僧。當願眾生。統理大眾。一切無礙。和南
聖眾。

(淨土文及迴向偈。當對佛跪念。念畢。起身三禮而退。)

南无护法韦驮尊天菩萨



此咒置經書中可滅誤跨之罪